

a Epist. Synod.
Conc. Valent. ad
Episc. Gall.

b Epist. Max. Imp.
ad Siris. P.

c Epist. Synod.
Conc. Taur. ad
Episc. Gall.

d Zosimusepist. 6.

e Bonifac. ep. 1.

f Hincem. ep. 5. c. 17.

V.
NOTITIAM AL-
LATAM CIVILEM
ESSE, NON ECCLE-
SIASTICAM.

g Zachar. epist. 14.
ad Bonifac.

Synodica^a Concilij Valentini ad vniuersos Episcopos Galliarum, quæ sic incipit. [Dilectissimis Fratribus per Gallias & quinque Prouincias constitutis Episcopis.] Item in epistola Maximi^b Imperatoris ad Siricium Papam, in qua se permissurum Synodum Episcoporum Gallia, qui de Agricio presbytero iudicent, his verbis scribit: [Querum conuentum ex opportunitate omnium, vel qui intra Gallias, vel qui intra quinque Prouincias commorantur, in qua elegerint vrbe constituam.] Nec non & idem legitur in alia Synodica^c Concilij Taurinensis ad Episcopos Galliarum hæc habente: [Sancta Synodus, quæ cõuenit in vrbe Taurinatium die decima Kalendas Octobris, fratribus dilectissimis per Gallias & quinque Prouincias constitutis.] Aliquot post annos septem Prouinciarum mentio fit in Epistola^d Zosimi Papæ ad Episcopos Africa, Gallia & Hispania, cuius hoc initium est: [Zosimus Aurelio & vniuersis Episcopis per Africam constitutis, vniuersis Episcopis per Gallias & septem prouincias constitutis, vniuersis Episcopis per Hispaniam constitutis.] Simile videre est in epistola Bonifacij Papæ^e ad Episcopos Gallia, quæ sic habet. [Bonifacius Episcopus Patroclo, Remigio, Maximo, Hilario, Seuerio, Valerio, Iuliano, Castorio, Leontio, Constantino, Ioanni, Montano, Marino, Mauritio, & cæteris Episcopis per Gallias & septem Prouincias constitutis.]

Quæ autem fuerint hæ septem Prouincia, patet ex Notitia modo allata, quæ harum nomine Viennensem, Aquitaniam primam & secundam, Nouempopulaniam, Narbonensem vtramque, & Alpes maritimas complectitur. Nec audiendus est postea Hincmarus^f in epistolis, dum per has intelligendas esse scribit Viennensem, Lugdunensem, Narbonensem primam & secundam, Alpinam, Nouempopulanam, & secundam Aquitanicam: Lugdunensem enim pro Aquitanica prima ponit, mendisque plurimis refertam Nouellam Honorij & Theodosij profert, quam doctissimus Sirmundus integram ex Codice Arelateni restituit, quamque dabimus vbi de Arelato.

Alterum non minus obseruatione dignum referam, scilicet prædictam Notitiam civilem tantum fuisse, & non Ecclesiasticam. Notitia Ciuilis vocatur, in qua Metropoles Ciuiles & prouinciarum ciuitates castraque numerantur: Ecclesiastica verò, qua Metropoles Ecclesiasticæ seu Archiepiscopales & ciuitates Episcopales ipsis subiectæ. Quod autem Notitia hæc Ecclesiastica non fuerit, satis probauero, si plures ex Metropolitibus in ea recensitis Archiepiscopales non fuisse, sicut nec plures ciuitates Episcopales, demonstraue- rim. Id primum de Moguntia dicam, apud quam nonnisi sedem Episcopalem fuisse vsque ad Bonifacium Archiepiscopum & Germania Apostolum sub Zacharia Papa, qui hanc Archiepiscopalem fecit in fauorem eiusdem Bonifacij, clarissime videre est in Epistola^g huius summi Pontificis ad Bonifacium. [Idcirco, inquit, Beati Petri Apostoli autoritate sancimus, vt supradicta Ecclesia Moguntina perpetuis temporibus tibi & successoribus tuis in Metropolim sit confirmata; habens sub se has quinque ciuitates, id est Tungris, Coloniam, Vormatiam, Spiraciam, & Trectis, & omnes Germania gentes, quas tua Fraternitas per suam prædicationem Christi lumen agnoscere fecit.]